

Bosna i Hercegovina
Federacija Bosne i Hercegovine
TUZLANSKI KANTON

KANTONALNI SUD U TUZLI

Broj: 003-0-Su-23-000 298

Datum, 31. avgust 2023. godine

Na osnovu člana 71., a u vezi sa članom 73. stav 2. Zakona o državnoj službi u Tuzlanskom kantonu ("Službene novine Tuzlanskog kantona", broj 07/17, 10/17, 10/18, 14/18, 8/21, 10/22 i 14/22), predsjednica Kantonalnog suda u Tuzli donosi

ODLUKU

o poništenju Internog oglasa i Dopune Internog oglasa
za popunu upražnjenog radnog mjesta namještenika – prijem
- Višeg referenta za operativno – tehničke poslove u radni odnos na
neodređeno vrijeme (4 izvršioca)

I

Poništava se Interni oglas i Dopuna Internog oglasa, za popunu upražnjenog radnog mjesta prijem namještenika – Višeg referenta za operativno – tehničke poslove u radni odnos na neodređeno vrijeme (4 izvršioca), a koji su objavljeni na oglasnoj ploči suda, kao i web. stranici suda i to: Interni oglas dana 19.07.2023. godine, a Dopuna Internog oglasa dana 24.07.2023. godine, te koji su dostavljeni državnim organima na području Tuzlanskog kantona.

II

U skladu sa odredbom člana 74. Zakona o državnoj službi u Tuzlanskom kantonu, popunjavanje upražnjenog radnog mjesta namještenika – Višeg referenta za operativno – tehničke poslove iz stava I ove odluke, izvršit će se putem Javnog oglasa koji će se objaviti u jednim dnevnim novinama koje se distribuiraju na cijeloj teritoriji Bosne i Hercegovine i na službenoj internet stranici Kantonalnog suda u Tuzli.

III

Ova odluka stupa na snagu danom donošenja i bit će objavljena na oglasnoj ploči suda i službenoj web. stranici suda.

Obrazloženje

Prema Pravilniku o unutrašnjoj organizaciji Kantonalnog suda u Tuzli, upražnjena su 4 (četiri) radna mjesta – Višeg referenta za operativno – tehničke poslove (daktilografa), radi čega je Kantonalni sud u Tuzli tražio od Vlade Tuzlanskog kantona saglasnost za popunu upražnjenih radnih mjesta, a zbog iskazane neophodne podrške u radu sudijama Kantonalnog suda u Tuzli. Imajući u vidu činjenicu da postojeći broj viših referenata za operativno – tehničke poslove nije odgovarajući broju zaposlenih sudija, te obzirom na značajno povećanje obima posla koji obavljaju sudije u posljednjih nekoliko godina, iskazana je potreba da svaki od sudija ima svog saradnika, odnosno daktilografa, a sve u cilju efikasnijeg rada ovog suda.

Vlada Tuzlanskog kantona, donijela je Odluku broj 02/1-30-7150-1/23 od 13.06.2023. godine, kojom daje saglasnost Kantonalnom sudu u Tuzli za prijem 4 (četiri) namještenika – Viša referenta za operativno – tehničke poslove.

U skladu sa odredbom člana 72. i 73. Zakona o državnoj službi u Tuzlanskom kantonu, raspisan je Interni oglas za popunu upražnjenih radnih mjesta, koji je objavljen na oglasnoj ploči suda dana 19.07.2023. godine i istog dana na web. stranici suda, te dostavljen državnim organima na području Tuzlanskog kantona, a čiji tekst je dopunjen u pogledu podnošenja potrebne dokumentacije dana 24.07.2023. godine, te je istog dana dopuna Internog oglasa objavljena na oglasnoj ploči suda, kao i na web. stranici suda, te dostavljena državnim organima na području Tuzlanskog kantona, kako bi kandidati u roku od 8 (osam) dana, od dana objave dopune Internog oglasa mogli podnijeti prijave na isti.

Za provođenje procedure Internog oglasa i Dopune istog imenovana je komisija od tri člana, od kojih je jedan predstavnik Sindikata, a koja komisija je nakon proteka roka od 8 (osam) dana, određenog za dostavljanje prijava, zapisnički dana 17.08.2023. godine, konstatovala da su na Interni oglas i Dopunu Internog oglasa podnesene četiri prijave i to prijave kandidatkinja: Pašić Amele, Bečić Azre, Hadžiefendić Melise i Đulović Sandre, sve četiri iz Tuzle.

Ispitujući urednost podnesenih prijava, komisija je konstatovala da je uredna i potpuna samo jedna prijava kandidatkinje Pašić Amele, zaposlene u državnom organu, odnosno u Općinskom sudu u Tuzli, na poziciji Višeg referenta za operativno – tehničke poslove (daktilograf), dok je prijava kandidatkinje Bečić Azre, ocijenjena kao nedopuštena, iz razloga što kandidatkinja ne ostvaruje pravo prijave na Interni oglas, jer nije zaposlena u organu državne službe, kako je to propisano članom 72. stav 3. Zakona o državnoj službi u Tuzlanskom kantonu, nego je zaposlena u Javnoj ustanovi Mješovita srednja hemijska škola Tuzla. Prijava kandidatkinje Hadžiefendić Melise ocijenjena je kao nepotpuna, obzirom da u vrijeme podnošenja prijave nije bio poznat radno – pravni status kandidatkinje nakon obavljenog probnog rada u trajanju od tri mjeseca u državnom organu, odnosno ista nije dostavila

dokaz – rješenje kojim se potvrđuje njen raspored kao namještenika na radno mjesto nakon okončanog probnog rada kojem je podlijegala. Prijava kandidatkinje Đulović Sandre također je ocijenjena kao nepotpuna, iz razloga što ista nije dostavila potvrdu o radnom stažu, traženu tekstom Internog oglasa. Iz naprijed navedenih razloga prijave imenovanih kandidatkinja nisu ni mogle biti razmatrane.

Komisija za provođenje Internog oglasa je utvrdila da se na Interni oglas prijavila samo kandidatkinja Pašić Amela, čija je prijava bila potpuna, ali kako nije zadovoljen princip konkurentnosti, iz razloga što nije bilo više prijavljenih kandidata, to nije bilo moguće sačiniti listu uspješnih kandidata, pa je Komisija zapisnik dostavila na dalje postupanje predsjednici suda.

Odredbom člana 73. stav 2. Zakona o državnoj službi u Tuzlanskom kantonu, propisano je da Komisija za provođenje Internog oglasa razmatra sve prijave podnesene na Interni oglas i utvrđuje listu kandidata koji ispunjavaju uslove oglasa i listu kandidata koji ne ispunjavaju uslove oglasa, o čemu sastavlja zapisnik, a dalje u stavu 3. istog člana citiranog Zakona, da rukovodilac organa državne službe odlučuje o prijemu namještenika u radni odnos sa liste kandidata koji ispunjavaju sve uslove Internog oglasa, o čemu donosi rješenje.

U konkretnoj situaciji, na Interni oglas i dopunu istog, potpunu prijavu je podnijela samo jedna kandidatkinja, zbog čega u takvoj situaciji Komisija nije mogla sačiniti listu sa više kandidata koji ispunjavaju uslove Internog oglasa. Kako se u ovakvoj situaciji nije mogao ispoštovati princip konkurencije, da se između nekoliko kandidata koji ispunjavaju uslove Internog oglasa izabere kandidat koji je po kvalitetu najbolji kandidat za upražnjeno radno mjesto, predsjednica suda je odlučila da se shodno odredbi člana 73. stav 2. Zakona o državnoj službi u Tuzlanskom kantonu poništi Interni oglas i Dopuna Internog oglasa za popunu 4 (četiri) upražnjena radna mjesta – Viši referent za operativno – tehničke poslove i pristupi objavljivanju Javnog oglasa za ista radna mjesta, u jednim dnevnim novinama koje se distribuiraju na cijeloj teritoriji Bosne i Hercegovine, te na službenoj internet stranici Kantonalnog suda u Tuzli, a shodno odredbi člana 74. Zakona o državnoj službi u Tuzlanskom kantonu.



PREDSJEDNICA SUDA

Indira Hadžimehmedović